

RIJEČ GLAVNE UREDNICE

EDITORIAL

Medžida Mulić

Radujem se što Vam se obraćam po drugi puta u 2011. godini. Geodetski glasnik – glasilo Saveza udruženja građana geodetske struke Bosne i Hercegovine, ima tradiciju publiciranja dugu pune 44 godine, i sad izlazi drugi put u jednoj kalendarskoj godini. Nadam se da će ovakav kontinuitet izlaska Geodetskog glasnika biti nastavljen i u budućnosti. To je prvi korak u postizanju našeg konačnog cilja: registracije Geodetskog glasnika u međunarodnim bazama podataka. Također se nadamo se da će ovaj i naredni brojevi Geodetskog glasnika u mnogome proširiti saznanja svih nas iz oblasti geodetske struke, ali i informisati nas o dešavanjima koja su direktno ili indirektno vezana za geodetsku struku.

Geodetski glasnik pripremamo sa željom da informišemo bosanskohercegovačke geodete, kao i pripadnike naše geodetske struke iz regije, o aktuelnim dešavanjima, tehnološkim dostignućima, obavijestima o napredovanju kolegica i kolega, izvještajima sa stručnih i naučnih skupova, itd. Toplo preporučujem svim ljubiteljima nauke, a posebno geodezije, da se aktivno uključe u izdavanje Geodetskog glasnika. Bilo bi nam posebno drago da pišete o svom radu, o dešavanjima u vašem okruženju, o stečenim iskustvima odnosno o svemu za šta mislite da bi nam svima bilo od koristi; da naučimo nešto novo, da saznamo neku novu vijest i da upoznamo prilike u kojima radite. Uredništvo časopisa će sa zadovoljstvom objaviti sve Vaše članke ukoliko zadovoljavaju naučne i stručne kriterije za objavljivanje.

Zahvalnost za finansijsku podršku štampanju ovog 41. broja Vašeg i našeg Geodetskog glasnika pripada Federalnom ministarstvu za obrazovanje FBiH, koje je odobrilo aplikaciju za podršku našem glasilu. Najveći trud za sastavljanje aplikacije uložio je mr.sc. Jusuf Topoljak, dipl.inž.geodezije. Ovom prilikom uredništvo Geodetskog glasnika mu se zahvaljuje na njegovom entuzijazmu i vremenu koje je uložio za pravljenje kvalitetne aplikacije, koja je ocijenjena kao vrijedna pažnje i finansija iz budžeta Federacije Bosne i Hercegovine. Posebnu zahvalnost dugujem autorima članaka, ali isto tako i recenzentima članaka koji su omogućili da kvaliteta radova bude na visokom nivou.

Tehnička uređenost Geodetskog glasnika je rezultat marljivog rada naših kolega doc.dr.sc. Admira Mulahusića i mr.sc. Nedima Tune, koji nisu žalili vrijeme ni trud za tehničku obradu i ovog broja Geodetskog glasnika.

Koristim priliku da se još jednom zahvalim svima koji su pomogli izdavanje ovog broja Geodetskog glasnika, a posebno Federalnom ministarstvu obrazovanja i nauke u Mostaru što je u okviru projekta "Podrška izdavanju naučnih časopisa, zbornika radova i bibliografija u 2011 godini" razmotrilo i prihvatilo aplikaciju za izdavanje Geodetskog glasnika, te se zahvaljujem uposlenicima ministarstva koji su obradili zahtjev i odobrili sredstva za štampanje časopisa. Zahvaljujem se i kompanijama Zedis d.o.o. Zenica i GeoWILD d.o.o. Sarajevo koje su finansijski pomogle izdavanje ovog broja.

Na kraju mi ostaje jedino da Vas podstaknem da pišete i šaljete radove kako bi sadržina idućih brojeva Geodetskog glasnika bila zanimljiva, a prije svega korisna za sve čitaoce časopisa.

Mr.sc.Medžida Mulić, dipl.inž.geod.